

Aalisarneq pillugu Inatsisartut inatsisaat

Kapitali 1

Siunertat, atuuffia, nassuiaatit aamma oqartussaasut pillugit aalajangersakkat

Siunertaq

§ 1. Kalaallit Nunaanni aalisakkanit isumalluutit kalaallit inuiaqatigiit ataatsimut pigaat. Inatsisartut inatsisaata matuma siunertaraa inuiaqatigiit siunissami aalisarnermiit sapinngisamik annerpaamik iluanaaruteqarnissaasa qulakkeerneqarnissaa peqatigisaanillu aalisarnermik inuussutissarsiummi tunngaviusunik piumasaqaatit ataqatigiissut patajaatsullu pilersinneqarlutik.

Imm. 2. Inatsimmik matuminnga aqutsinermi aalisarnermi isumalluutit nungusaataanngitsumik iluaqutigineqarneri aamma aalisagaqatigiit nungusaataanngitsumik siunissami ungasinnerusumi annerpaamik pissarsiffusinnaallutik qaffasissuseqarnerisa allanngortinnginnissaat pingaartinneqassaaq.

Imm. 3. Inatsisartut inatsisaannik matuminnga aqutsinermi aamma pingaartinneqassapput:

- 1) aalisarnermi piginnaasat aamma aalisarnermi periarfissat akornanni oqimaaqatigiittoqassasoq, piginnaasallu sunniuteqarluartumik iluaqutigineqassasut;
- 2) inuussutissarsiutip inuiaqatigiillu ineriartortinnissaanut ineriartorteqqinnissaannullu iluaqutaasumik aningaasaliinissap kajuminnartuunissaa,
- 3) ilisimatuussutsikkut siunnersuineq,
- 4) najugaq pillugu ilaqutariinnermullu tunngasunik isiginnineq
- 5) illugiilluni nunanilu tamalaani isumaqatigiissutit nunallu tamalaat akornanni isumaqatigiissutaat,
- 6) immami pinngortitami pissuseqatigiit ataqatigiinnerannut aalisarnerup ajoqutaanerata minnerpaaffianiititsineq,
- 7) inuit imminut pilersorsinnaanissamut periarfissaqartitaanissaat,
- 8) attuumassuteqartunik peqataatitsineq, aamma
- 9) aalisarnerup ammasumik pissuseqarfusumik ingerlanneqarnera aqunneqarneralu.

Atuuffia

§ 2. Inatsit aalisakkatigut pisuussutiniq iluaquteqarnermut aamma Kalaallit Nunaata aalisarnikkut oqartussaaffigisaani isumalluutiniq iluaquteqartunik aalisarnermik aqutsinermi, Kalaallit Nunaata aalisarnikkut oqartussaaffiata avataani kalaallit ingerlataqartut inuussutissarsiutigalugu aalisarnerannut aamma Kalaallit Nunaata aalisarnikkut oqartussaaffiata avataani kalaallinut pisassiissutiniq nunat allamiut angallataasa aalisarnerannut kiisalu nunat marluk imaluunniit nunat tamalaat isumaqatigiissutaat naapertorlugu Kalaallit Nunaat inatsisikkut imaluunniit nakkutilliinikkut oqartussaaffiani atorneqarpoq.

§ 3. Inatsisartut inatsisaanni uku ima paasineqassapput:

- 1) "Aalisarneq", aalisakkanik sumiissusersiuneq, aalisarnermi atortunik ningitsineq, kalinneq amuarnerlu, pisanik angallammut qaqitsineq, nuussineq, aalisakkanik ungalusanut inissiineq, aamma aalisakkanik aalisakkanillu tunisassianik tulaassineq. Tassunga atatillugu qaleruallit qalerualinnillu tunisassiat aalisakkamut naligitinneqarput.
- 2) "Inuussutissarsiutigalugu aalisarneq" piset tamarmiusut taakkualuunniit ilaasa tunineqarnissaat siunertaralugu aalisarneq.
- 3) "Inuussutissarsiutigalugu aalisarneq" piset tamarmiusut nammineq atornissaat siunertaralugu aalisarneq.
- 4) "Sinerissap qanittuani aalisarneq", sineriammit avammut 3 sœmili angullugu, tunngaviusumik killeqarfiup iluani aalisarneq.
- 5) "Avataasiorluni aalisarneq": aalisarneq, sinerissap qanittuani aalisarfusup avataani aalisarneq.
- 6) "Assigiimmik inuussutissarsiutillit", inuussutissarsiutitut pingaarnertut inuussutissarsiutigalugu aalisarnermik, inuussutissarsiutigalugu aalisarnermik imaluunniit inuussutissarsiutigalugu aalisarnermik ingerlatsinersut naapertorlugit inuttut ataatsimoortutut erseqqinnerusumik killilerneqarsimasut.
- 7) "Pisassat amerlanerpaaffilerlugit akuerisat." TAC tassaavoq Kalaallit Nunaanni aalisakkanut aalajangersimasunut ukiumut amerlanerpaaffilerlugit akuerisaasumik pisarineqarsinnaasut.
- 8) "Pisassiissutit": pisassiissutinit amerlanerpaaffiliilluni pisassiissutit ilaannit akuerisat ilaat.
- 9) "Pisassiissutinit": pigisat Ingerlatsisup pisassiissutinit pigisai.
- 10) "Ukiumut pisassiissutit": ukiumi aalajangersimasumi pisassiissutinit aalisartup amerlanerpaamik piasinnaasai.
- 11) "Akuersissut": sumiiffimmi aalajangersimasumi piffissamilu aalajangersimasumi aalisagaqatigiinnik aalajangersimasunik aalisarnissamut akuersissut.
- 12) "Angallat": imaani nunamiluunniit assartuut suugaluartorluunniit aalisarnermut atatillugu atornerqartoq.
- 13) "Aalisariutit ilaat immikkoortut", aalisariutit ilaat immikkoortut erseqqinnerusumik killilerneqarsimasut.
- 14) "Usinik nuussineq": pisanik tunitsivinnut tunineqanngitsunik imaluunniit taakkunanit tunisassiarineqarsimasut angallammit angallammut nuussinnek, tamanna imaani umiarsualivimmiluunniit pisinnaavoq.
- 15) "Piareersaaneq Tunisassianik suliaqarneq": pisanik suliarinninneq tamaat, saliineq, niaquiaaneq sikulersuinerlu ilanngunnagit.
- 16) "Kalaallit aalisariutaat", angallatit suulluunniit Kalaallit Nunaanni angerlarsimaffeqartutut nalunaarsorneqarsimasut § 10-milu piumasaqaatinik naammassinnittut.
- 17) "Nunat allat angallataat": angallat sunaluunniit Kalaallit Nunaanni angerlarsimaffeqartutut nalunaarsorneqarsimangitsoq.
- 18) "Tulaassineq": pisanik tunisassianilluunniit suugaluartunik taakkunannga angallammiit nunamut niusineq.

- 19) "Pisat": imaani uumasut tamarmik, soorlu miluumasut imarmiut, timmissat imarmiut, koralit pupiillu aalisarnermi isumannaarneqarsimasut.
- 20) "Kalaallit Nunaata aalisarnikkut oqartussaaffigisaa": Kalaallit Nunaata aalisarnikkut oqartussaaffigisaa (EEZ) Kalaallit Nunaata aalisarnikkut oqartussaaffigisaa aamma Kalaallit Nunaata imartatut oqartussaaffigisaa pillugu peqqussutit qaqugukkulluunniit atuuttut naapertorlugit aalajangersarneqartoq.
- 21) "Ingerlatsisoq": aalisarnermik ingerlatsisoq, inuttut ataasiakkaatut, soqutigisaqaqatigiittut, piginneqatigiilluni umiarsuaatileqatigiiffittut, ingerlatseqatigiiffittut allatigulluunniit suliffeqarfittut naalagaaffittulluunniit ilusilittut tamanna pigaluarpat apeqqutaatinneqanngitsaq.
- 22) "Tunisineq": pisanik akilersillugit niuernikkut ingerlatsineq.
- 23) "Pisanik tulaassisussaataitaneq": pisarineqartut, Kalaallit Nunaanni nunami suliffissuarnut tunisassiatut suliarineqaqqaaratik tunineqartussat.
- 24) "Pisat tulaassisussaataitaneq": pisat aalisariutinit toqqaannartumik avammut tunineqarsinnaasut imaluunniit Kalaallit Nunaanni suliffissuarnut suliarereerlugit tunineqarsinnaasut.
- 25) "Aalisagaqatigiit": uumassusileqatigiit ataasiakkaat assigiit ataatsimoortut, nunap ilaani immikkoortumi killilimmi piffissami aalajangersimasumi ataatsimoorlutik uumasuusut aamma aalisagaqatigiinnit allanit sananeqaatitigut paarlaaqatiginnissaat ilimananngitsorujussuaq.
- 26) "Aalisarneq": Nr. 1-imi nassuiarneqartumik ingerlatsineq, aalisagaqatigiinnik aalajangersimasunik imaluunniit amerlassutsinik, sumiiffimmi aalajangersimasumi imaluunniit periutsimik aalajangersimasumik tamanna ingerlanneqarpat.
- 27) "Nakkutilliinermi oqartussaq": Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisui imaluunniit § 5 imm. 2 naapertorlugu oqartussaq Naalakkersuisunit toqqarneqartoq.

Oqartussaasut pillugit aalajangersakkat

§ 4. Inatsimmi matumani aalajangersakkat suliarineqarnerat Naalakkersuisut qulakkiissavaat.

§ 5. Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisut ingerlatsisut inatsit, takuuk kapitel 14, naapertorlugu iliuuseqarnerisut misissussavaat nakkutigalugillu.

Imm. 2. Naalakkersuisut nakkutilliinermik allanik oqartussanik toqqaasinnaapput, Kalaallit Nunaanni Aalisarsinnaanermut Akuersissutinik Nakkutilliisoqarfiup aamma sakkutuut imarsiortut aalisarnermik nakkutilliisut toqqarnagit.

Imm. 3. Aalajangiinermut piginnaatitaanermik inatsimmi akisussaaffiit pillugit kommunalbestyrelsinut sinniisuusinnaatitaanermut tamakkiisumut ilaannakortumilluunniit malittarisassanik Naalakkersuisut aalajangersaasinnaapput.

Kapitali 2

Kalaallit Nunaata aalisarnikkut oqartussaaffigisaani aalisarsinnaaneq pillugu piumasaqaatit

Kalaallit Nunaata aalisarnikkut oqartussaaffigisaani inuussutissarsiutiginaq aalisarneq

§ 6. Inuit Kalaallit Nunaanni aalajangersimasumik najugaqartut Kalaallit Nunaata aalisarnikkut oqartussaaffigisaani siumut akuersissuteqaratik inuussutissarsiutigingu aalisarsinnaapput, taamaattoq tak. § 7.

Imm. 2. Inuit Kalaallit Nunaanni aalajangersimasumik najugaqanngitsut inuussutissarsiutigingu aalisarsinnaassagunik akuersissummik peqartussaapput.

Imm. 3. Naalakkersuisut imm. 2 naapertorlugu aalisarnissamut akuersissummik tunniussisarneq pillugu aalajangersaasinnaapput, pissarsisarneq annaasaqartarnerlu pillugit malittarisassanik aalajangersaasinnaapput.

§ 7. Aalisakkanut aalajangersimasunut aalisagaqatigiinnullu inuussutissarsiutigingu aalisarnissamut akuersissuteqartarneq pillugu malittarisassanik Naalakkersuisut aalajangersaasinnaapput.

Imm. 2. Imm. 1 naapertorlugu malittarisassanik aalajangersaanermi Inatsisartut inatsisaanni matumani, takuuk § 1, siunertat pillugit aalajangersakkat pingaartinneqarput, matumani aalisakkat isumalluutigineqartut isumatusaartumik iluaqutigineqarnissaasa aamma illersorneqarsinnaasumik aalisarneqartarnissaat pineqarpoq, aamma matumani takornariaqarnermik inuussutissarsiuteqarneq pineqarluni, taassumalu ineriartornissaa.

Inuussutissarsiutigalugu aalisarnermut tunngaviumik piumasaqaatit

§ 8. Kalaallit Nunaata aalisarnikkut oqartussaaffigisaani inuussutissarsiutigalugu aalisarnermut tunngaviuvoq akuersissut, inatsit manna naapertorlugu atulersinneqartoq, tak. kapitali 6.

Imm. 2. Akuersissummik, tak. imm. 1, tunngaviuvoq §§ 9 - 10-mi (kalaallit ingerlatsisut) imaluunniit § 13 (nuna allamiut ingerlatsisut) piumasaqaatit naammassisimanissaat, imaluunniit § 11 naapertorlugu immikkut akuersisoqarsimaneramik nalunaartoqarsimassaaq.

Kalaallit ingerlatsisut Kalaallit Nunaata aalisarnikkut oqartussaaffigisaani inuussutissarsiutigalugu aalisarnerat

§ 9. Kalaallinut ingerlatsisunut akuersissut taamaallaat pissarsiarineqarsinnaavoq pigineqarsinnaallunilu ingerlatsisunit:

- 1) imm. 2-mi piumasaqaatinik naammassinnittumit inummit,
- 2) inatsisitigut akisussaataasooq, imm. 3-mi piumasaqaatinik naammassinnittoq, taamaattoq inuit ataasiakkaat minillugit imaluunniit
- 3) ingerlatseqatigiiffik pisortanit pigineqartoq imaluunniit Kalaallit Nunaanni peqatigiiffik, imaluunniit ingerlatseqatigiiffik peqatigiiffilluunniit Kalaallit Nunaanni Namminersorlutik Oqartussanit ilaasortaaffigineqartoq.

Imm. 2. Ingerlatsisooq, inuttut ataasiakkaatut inissippat, inuk pineqartoq, taava taanna:

- 1) kalaallinut inuiaqatigiinnut aalajangersimasumik attuumassuteqassaaq,
- 2) inuit nalunaarsorsimaffianni Kalaallit Nunaanni najugaqartut ukiunilu tallimani qaangiuttuni sivilisunerumilluunniit inuit nalunaarsorsimaffianni Kalaallit Nunaanni najugaqartutut nalunaarsimassalluni, aamma
- 3) Kalaallit Nunaannut tamakkiisumik akileraartartussaataaassaaq aamma ukiuni tallimani qaangiuttuni, qaammatisiutit naapertorlugit, sivilisunerumilluunniit Kalaallit Nunaannut tamakkiisumik

akileraartartussaataasimassalluni.

Imm. 3. Ingerlatsisoq inatsisitigut akisussaasuuppat, piumasaqaatit uku naammassineqarsimassapput:

1) Ingerlatsisoq aktiaateqarluni ingerlatseqatigiiffussaaq, piginneqataassuteqarluni

ingerlatseqatigiiffussaaq, piginneqatigiiffussaaq, soqutigisaqaqatigiiffussaaq imaluunniit

piginneqatigiilluni aalisariutaatileqatigiiffussalluni.

2) Inatsisitigut oqartussaasup aningaasaatai inunnit ataasiakkaanit toqqaannartumik imaluunniit

toqqaannangitsumik pigineqassapput, imaluunniit ingerlatseqatigiiffinnik piginnittunit imm. 2-mi

piumasaqaatinik naammassinnittunit, imaluunniit soraarnerussutisiaqalernissamut aningaasaateqarfinnit

pigineqassapput, piginnittuunermt taasisinnaatitaanermi assigisaanilluunniit aqputigalugit

sunniuteqarsinnaaneq assigiissinneqassaaq.

Imm. 4. Imm. 3, nr. 2-mi soraarnerussutisiaqarnissamut aningaasaateqarfinnik taaneqartut Kalaallit

Nunaanni najugaqartutut nalunaarsorneqarsimassapput aamma Kalaallit Nunaannut tamakkiisumik

akileraartussaataasallutik.

Imm. 5. Akuersissummik pissarsiniaraanni ingerlatsisoq Qitiusumik Suliffeqarfiit Nalunaarsuiffianni

(CVR-imik nalunaarsuiffimmi) nalunaarsorsimassaaq.

Imm. 6. Naalakkersuisut imm. 1-4-mi piumasarineqartut naammassineqarsimanersut

uppersaqqusinnaavaat.

§ 10. Akuersissut ingerlatsisumut aalajangersimasumut angallammik aalajangersimasumik pigisalimmut

atulersinneqassaaq, tak. § 9. Akuersissummik kisimi piginnittoq aalisariummik aalisarsinnaatitaavoq.

Meterinik arfinilinnik naannerusumik akuersissuteqarluni aalisartoq, akuersissutini nammineerluni

pigalugu aalisassaaq.

Imm. 2. Angallat angallatinut malittarisassat atuuttut atuutilertartullu naapertorlugit

nalunaarsorneqarsimassaaq.

§ 11. Kinguaariit nikinneranni, pineqartorlu piffissani taaneqartuni ilinniagaqarneq siunertaralugu,

napparsimaneq assigisaaluunniit pissutigalugit Kalaallit Nunaata avataani najugaqarallarsimappat § 9,

imm. 2, nr. 2 aamma 3-mi aamma imm. 3, nr. 2-mi piumasaqaatinit immikkut akuersinermik

Naalakkersuisut nalunaaruteqarsinnaapput.

Imm. 2. Pissutsit immikkut ittut atuutsillugit inuussutissarsiutigalugu aalisarnerup nammineq

angallatigisamit ingerlanneqarnissaa pillugu § 10, imm. 1-mi piumasaqaatinit Naalakkersuisut immikkut

akuersissuteqarallarsinnaapput, angallat umiarpas, sivilunerusumik siumullu naatsorsuutiginnisamik

amutsivimmiippat imaluunniit pissutsit allat tamatumunnga assingusumik pisoqarpat angallallu nammineq

pigisaq aalisarsinnaajunnaarpat. Immikkut akuersissuteqarnermi angallammik Kalaallit Nunaanni

najugaqartutut nalunaarsorsimasumik attartortoqassaaq, angallammik Kalaallit Nunaanni najugaqartutut

nalunaarsorsimasumik attartornissaq ajornarpat uppersarneqassaaq.

Imm. 3. Aningaasat akiligassaqarfinnit pissarsiariniarneqareernerisa malitsigisaanik angallat imaluunniit

pisassanit pigisat, tak. § 29, tunniunneqarsimappata § 9, imm. 2 aamma imm. 3-mi piumasaqaatiniit

immikkut akuersinermik Naalakkersuisut nalunaaruteqarsinnaapput. Immikkut akuersineq

atulersitsinermiit ukiumi ataatsimi atuutissaaq immikkorluinnarlu pisoqarnerani sivitsorneqarsinnaalluni.

Imm. 4. Naalakkersuisut aalajangersagaq taanna naapertorlugu immikkut akuersisimaneq piffissami

killeqartissinnaavaat aamma erseqqinnerusumik piumasaqaatit allanneqartut piumasarlugit.

§ 12. § 10, imm. 1, naapertorlugu inuussutissarsiorluni aalisarnermi angallatinik siusinnerusukkut Kaalaallit Nunaanni aalisariutitut nalunaarsorneqarsimanngitsunik pisinissamut akuersissuteqaqqaartoqarnissaa pillugu Naalakkersuisut erseqqinnerusumik malittarisassiorsinnaapput.

Imm. 2. Imm. 1 naapertorlugu akuersissutini piumasaqaatigineqarsinnaavoq angallat aalisakkanik aalajangersimasunik aalisarnermut atorneqassasoq angallalluunniit aalajangersimasumik pisaqarsinnaassusilik aalisarunnaarsinneqassasoq.

Nunat allamiut ingerlatsisut Kalaallit Nunaata aalisarnikkut oqartussaaffigisaani inuussutissarsiutigalugu aalisarnerat

§ 13. Nunamit allameersut Kalaallit Nunaata aalisarnikkut oqartussaaffiani inuussutissarsiutigalugu aalisarsinnaapput ingerlataqartoq nunat tamalaat akornanni isumaqatigiissutit naapertorlugit imaluunniit Naalakkersuisuniit immikkut nalunaarfigineqarnikkut § 25-mi piumasaqaatinik naammassinnittumik akuersissuteqalersimappat.

Imm. 2. Imm. 1 naapertorlugu aalisarneq tunngaviusumik killigititamiit (basisliniamiit) 12 sòmilit iluanni ingerlanneqarsinnaanngilaq.

Kapitali 3

Kalaallit Nunaata aalisarnikkut oqartussaaffigisaata avataani aalisarneq

§ 14. Kalaallit Nunaata aalisarnikkut oqartussaaffiata avataani aalisarneq pillugu malittarisassanik erseqqinnerusunik Naalakkersuisut aalajangersaasinnaapput.

Imm. 2. Kalaallit Nunaata aalisarnikkut oqartussaaffigisaata avataani inuussutissarsiutigalugu aalisarneq §§ 9 aamma 10-mi piumasaqaatinik naammassinnittunit ingerlatsisunit taamaallaat aalisarfigineqarsinnaavoq, aamma tamatumunnga aalisarsinnaanermut akuersisummik Naalakkersuisut atulersitsisimatinnagit aalisarneq aallartinneqarsinnaanani.

Kapitali 4

Inuussutissarsiutigalugu aalisarneq pillugu malittarisassaliorneq

Malittarisassatigut aaqqiinerit

§ 15. Inuussutissarsiutigalugu aalisarnermik malittarisassaliorneq pillugu malittarisassanik erseqqinnerusunik Naalakkersuisut aalajangersaasinnaapput. Aqutsinissamut pilersaarutini akuerineqareersimasuni aalisarnerit eqqarsaatigalugit malittarisassat taakku aqutsinissamut pilersaarummut naapertuutissapput, tak. § 16. Naalakkersuisut ilaatigut makkununga malittarisassanik atulersitsisinnaapput:

- 1) pisariaqarsinnaasut annertussutsit piffissamut agguarneri, nunami sumiiffinni erseqqinnerusumik nassuiarneqartuni aamma innuttaasut katitigaanerini pingaarnersiuiinernut naleqqiullugu,
- 2) aalisarnerup aallartinnera,

- 3) aalisarneq tamakkiisumik imaluunniit aalisarnerup ilaanik unitsitsineq, aalisaqatigiinnik immikkut aalisarneqartussatut pineqartuni
- 4) angallatit ataatsimoortut ilaannut angallatinut ataasiakkaanut imaluunniit aalisarnermi atortunut erseqqinnerusumik aalajangersakkanik pisassiissuteqarluni pisinneqarsinnaasunik agguassineq,
- 5) pisat suliarinissaat siunertaralugu pisinneqarsinnaasut amerlassusaasa agguarnissaat,
- 6) piffissaq aalisarfiusinnaasoq sivisunerpaaq, tulaassinerit amerlassusii aamma akuerisaasumik tulaassinermi ataatsimi pisinneqarsinnaasut amerlassusaat,
- 7) immikkut pisassiissutit pisinneqarsinnaasut amerlassusilikani pisinuukkat naammatsinniarlugit,
- 8) nunat tamalaat isumaqatigiissutaat pisussaaffillu naapertorlugit angallatinik nunanit allaneersunik attartorneq;
- 9) unioqqutitsisumik, nalunaarusiornertaqanngitsumik maleruagassaqartinneqanngitsumillu aalisarnerup pitsaaliorneqarnissaa, pinngitsoortinneqarnissaa unitsinneqarnissaa, aamma
- 10) piffissani eqqissisimatitsiviusuni piffissanilu allani aalisakkamik aalisaqatigiinnit aalajangersimasumik aalisarneq imaluunniit aalisaqatigiit arlaannik aalisarneqarsimasunik tunisineq inerteqqutaavoq.

Ukiunut arlalinnut aqutsinissamut pilersaarutit

§ 16. Naalakkersuisut Kalaallit Nunaata imartaani aalisagaqatigiinnut pingaarutilinnut aalisarnernullu tamanut ukiunut arlalinnut aqutsinissamik pilersaarutini akuersissuteqartassapput.

Imm. 2. Aqutsinissamik pilersaarutitut siunnersuutit soqutigisaqartut suleqatigalugit aamma nunani tamalaani isumaqatigiissutit naapertorlugit suliarineqassapput ilisimatuussutsikkullu siunnersuineq isiginiarneqartassaaq.

Imm. 3. Aqutsinissamik pilersaarut ukuninnga imaqassaaq:

- 1) Aalisagaqatigiinnik imaluunniit aalisagaqatigiinnik arlalinnik aamma aalisarnernik kiisalu nunap immikkoortua pilersaarummut ilaatinneqartoq allaaserineqassapput.
- 2) Aalisarnerit pillugit aqutsinermi anguniarneqartut, aqutsinermit pilersaarummi ilaatinneqassapput, inatsisip anguniagaanut naapertuullutik, tak. § 1.
- 3) Aalisagaqatigiinnut kisitsisitigut anguniakkat, taakkulu aalisarneqarnerisa sunnerneqarnerat inatsisip anguniagaanut naapertuuttut, tak. nr. 2.
- 4) Anguniakkat angunissaannut piffissaliussat.
- 5) Aalisagaqatigiinnut TAC-mik aamma imaluunniit pisassiissutini aalajangersaanermut malittarisassat, nr. 3-mi nassuiarneqartut, anguniakkanut naapertuuttussat.
- 6) Teknikikkut iliuuseqarnerit piujuartitsisussat pillugit malittarisassat anguniakkat pillugit pilersinneqartut, takuuk nr. 2 aamma 3.
- 7) Pilersaarutip nutarternissaanut suleriaasissaq piffissaliussarlu.

Imm. 4. Aqutsinissamik pilersaarutit aamma allanik imaqsinnaavoq, soorlu uku:

- 1) Pisassiissutit agguarnissaannut malittarisassat.
- 2) Paasissutissanik katersinissamut pilersaarut, paasissutissanik katersineq nalinginnaasumik pilersaarutit avaqqullugit.
- 3) Immikkut nakkutilliinissamut malittarisassat, pilersaarutip naammassineqarnissaanut nakkutiginninnermullu pisariaqartut.

Imm. 5. Aqutsinissamik pilersaarutit akuerineqarsimasut, aqutsinissamik pilersaarutit pilersaarutaasumik nutarterneqarnissaa sioqqullugu taamaallaat immikkut pisuni allanngortinneqarsinnaapput, takuuk imm. 3, nr. 7.

Kapitali 5

Pisarineqarsinnaasut amerlassusissaannik aalajangersaaneq agguaassinerlu

Akuerineqarsinnaasumik pisarineqarsinnaasut amerlanerpaaffissaat

§ 17. Ukiumoortumik pisarineqarsinnaasut amerlassusissaat (TAC) aqutsinissamik pilersaarut attuumassuteqartoq naapertorlugu aalisagaqatigiinnut ataasiakkaanut Naalakkersuisunit aalajangersarneqassaaq, tak. § 16. Aalisagaqatigiinnut aqutsinissamik pilersaarut akuerineqarsimanngippat ukiumoortumik pisarineqarsinnaasut amerlassusissaat Naalakkersuisunit aalajangerneqassaaq.

Imm. 2. Aalisagaqatigiinnut TAC-mut ilaassapput Kalaallit Nunaata aalisarnikkut oqartussaaffigisaani pisassaak kiisalu nunani tamalaani isumaqatigiissutit naapertorlugit Kalaallit Nunaata aalisarnikkut oqartussaaffigisaata avataani kalaallit aalisartut pisassaak.

Imm. 3. Immikkorluinnaq pisoqartillugu TAC-mik Naalakkersuisut iluarsisinnaapput. Iluarsineq ilisimatuussutsikkut siunnersuinermit aamma Aalisarneq pillugu siunnersuisoqatigiinniit tunngaveqassaaq, tak. § 54.

Imm. 4. Imm. 1 apeqqutaatinnagu aalisagaqatigiit aqutsinermik pilersaarummut ilaanngippata imaluunniit TAC-mi aqutsinissamut immikkut pissutissaqarluni tulluanngippat aalisagaqatigiinnut TAC-mik aalajangersaannginnissaaq Naalakkersuisunit toqqarneqarsinnaavoq.

Pisassiissutit

§ 18. Naalakkersuisut aalisagaqatigiinnut ataasiakkaanut TAC-mik aalisariutit immikkoortuinut assigiinngitsunut nunat tamat akornanni isumaqatigiissutit aqutsinissamillu pilersaarutit attuumassuteqartut isigalugit agguaassisassapput.

Imm. 2. Naalakkersuisut pisassiissutit ukiumoortumillu pisassiissutit agguaanneqarnissaannut piumasaqaatit pillugit sukumiinerusunik malittarisassiorsinnaapput aamma tassunga ilanngullugit pisassiissutit ukiumoortumillu pisassiissutit pissarsiarineqarsinnaasut immikkoortiterneqarnissaat agguaanneqarnissaallu pillugit sukumiinerusumik malittarisassiorsinnaallutik:

- 1) piffissaaq,
- 2) sumiiffiit,
- 3) aalisarnermi atortut assigiinngitsut,
- 4) inuussutissarsiuteqartut immikkoortui, aamma
- 5) aalisariutit immikkoortui.

§ 19. Akuersissutillip ukiumut pisassiissutit tamakkerlugit aalisarsinnaanngikkai ilimanarsippat agguaasseqqinnissaaq siunertarlugu ukiumut pisassiissutit tamaasa taakkuluunniit ilai Naalakkersuisut

utertissinnaavaat. Tamannali aalisakkanut kapitali 7-mi ilaatinneqartunut atuutinngilaq (pisassiissutit niuerutigineqarsinnaasut nammineq pigisat).

§ 20. TAC-p ilai akuersissummut imaluunniit § 18, imm. 1 naapertorlugu agguaassinerup ilaanut ilaanngippata Naalakkersuisut:

- 1) pisassiissutit pigisatut pisassat tamaasa taakkuluunniit ilai tuniniarsinnaavaat tak. § 31,
- 2) pisassat ukiumut pisassiissutitut tamaasa taakkuluunniit ilaat tuniniarsinnaavaat,
- 3) pisassiissutit ukiumut pisassiissutitut tamaasa taakkuluunniit ilaat misileraalluni aalisarnermut taarsiissutitut allamut tunniussinnaavaat, imaluunniit
- 4) pisassiissutit ilaat tamaasaluunniit nunanut allanut isumaqatigiissutit naapertorlugit taakkununga isumaqatigiissutigisat tamaasa taakkuluunniit ilaat neqeroorutigisinnaavaat.

Imm. 2. Imm. 1, nr. 1 aamma 2 naapertorlugu tunisinermi iluanaarutit nunatta karsianut tutsinneqassapput.

Aalisarnerup unitsinnera

§ 21. Aalisarnerup ingerlaannaq unitsinneqassaaq

- 1) ingerlatsisut ataasiakkaat pisassatik tamakkerpatigit,
- 2) Kalaallit Nunaannut TAC, tak. § 17, tamakkerlugu aalisarnerqarsimappat, taamaattoq tak. § 38, aamma
- 3) § 18 naapertorlugu pisassiissutit aalajangersarnerqarsimasut tamakkerlugit aalisarnerqarsimappata, taamaattoq tak. § 38.

Kapitali 6

Aalisarsinnaanermut akuersissuteqartarnerq

Akuersissutit

§ 22. Aalisarnissamut akuersissut ingerlatsisunut ataasiakkaanut ukiumoortumik nalunaarutigineqartarpoq, aamma pisarineqarsinnaasut amerlanerpaaffiannut attuumassuteqarsinnaalluni.

Imm. 2. Akuersissut Naalakkersuisunit atulersinneqassaaq.

§ 23. Naalakkersuisut akuersissutit tunniussisarnernut aamma akuersissutit attatiinnarneqarnissaannut malittarisassanik aalajangersaasinnaapput, aamma akuersissutit piumasaqaatit aalajangersinnaavaat, angallatit pisarineqarsinnaasut amerlassusaannut naleqqussaaniisaq ilaatigut siunertaralugu.

§ 24. Kalaallit Nunaanni tunisassiorfinnut pisanik tunisassiassanik tulaassisusaatitaaneq pillugu malittarisassanik Naalakkersuisut aalajangersaasinnaapput.

Imm. 2. Kalaallit Nunaata Kitaanili raajarniarnermi aalisarnermik ingerlataqartup ataatsip pisami 30 %-iinik tulaassisarnissaa atuuppoq.

§ 25. Aalisarnermut akuersissummi paasissutissat uku allassimassapput:

- 1) Akuersissutaatillip aqqa aamma Qitiusumik Suliffeqarfinnik Nalunaarsuiffimmi (CVR) normua.
- 2) Akuersissummut angallatit suut ilanngunneqarsimanersut, angallatip aqqa aamma ilisarnaatitut normua allassimassapput.
- 3) Aalisakkat suut akuersissut naapertorlugu aalisarsinnaatitaanersut.
- 4) Akuersissut naapertorlugu aalisakkat qanoq amerlatigisut aalisarsinnaatitaanersut.
- 5) Piffissap qanoq ilinerani akuersissut atuutissanersoq.
- 6) Nunap ilaani sumiiffinni sorlarni aalisartoqarsinnaasoq.
- 7) Pisat qanoq amerlatigisut qanorlu angallammi suliarineqassanersut.

Imm. 2. Akuersissut aalisarnermut pineqartumut piumasaqaatinik amerlanerusunik imaqsarsinnaavoq.

Imm. 3. § 28-mi malittarisassat tunngavigalugit atulersinneqarsimasunut akuersissutitut pisat amerlassusaat, tak. imm. 1, nr. 4 aamma TAC-mi pissarsiatut allanneqassapput, tak. § 17. Tamanna pillugu malittarisassat erseqqinnerusut Naalakkersuisunit aalajangersarneqarsinnaapput.

§ 26. Akuersissutit atulersinneqartup iluaqutiginissaanut pisinnaatitaaffigitinneqartuq

Naalakkersuisunit killilernerneqarsinnaavoq pisunilu sukannernerusuni imaluunniit pisuni uteqqiaffiusuni akuersissut ukunani arsaarinnissutigisinnaallugu:

- 1) Akuersissutit pillugit unioqqutitsisoqarpat.
- 2) Inatsisartut inatsisaanni aalajangersakkat imaluunniit taanna inatsit naapertorlugu malittarisassanik unioqqutitsisoqarpat.
- 3) Akuersissut amigartumik atorneqarpat.
- 4) Akiliummut akiliisoqarsimanngippat tak. § 27.

Akiliutit

§ 27. Naalakkersuisut sinerissap qanittuani avataanilu aalisarsinnaanermut akuersissutininik tunniussinerni akiliutigineqartussat pillugit erseqqissunik malittarisassaliorsinnaapput, aamma aalisarnissamut akuersinernut malittarisassaliorsinnaallutik. Aamma § 30, § 39, imm. 1, § 40 aamma § 41 naapertorlugit pisassiissutinit pigisanik ukiumoortumillu pisassiissutininik pisassiinerni malittarisassaliorsinnaapput, tunniussinerni pisassiinernilu akiliutigineqartussanik akileeqqusisinnaallutik.

Imm. 2. Naalakkersuisut imm. 1 naapertorlugu akiliutininik akiliisarnerup allaffissornikkut aqunneqarnera pillugu sukumiinerusunik malittarisassaliorsinnaapput, taakkununga aamma ilanngullugu akiliinngitsoorsimasut akiitsuminnik, akiligassanik kingusinaartumik akiliinermi ernialiussat ilanngullugit, akiliitinnagit Inatsisartut aalisarnek pillugu inatsisaat naapertorlugu akuersissutininik aalisarsinnaanermulluunniit akuersissutininik nutaanik pissarsisinaannginnerat pillugu aalajangersagaliorsinnaallutik.

Imm. 3. Akiligassanik akiliinngitsoqarpat, Inatsisartut inatsisaat una naapertorlugu, imaluunniit inatsimmi najoqqutassarineqartut naapertorlugit, kingusinnerpaamik akiliiffissaq nallerlugu akiliisoqarsimanngippat, akiligassaq qaammammut 1 procentimik ernialerneqartassaaq. Ernialiunneqartumut aningaasat ikinnerpaamik 50 koruuniusassapput.

Kapitali 7

Pisassiissutit niuerutigineqarsinnaasut nammineq pigisat

Pisassiissutinit pigisat

§ 28. Aalisagaqatigiinnut ukununga pisassiissutinit pigisani pisassiissutit immikkoortiterneri tunngavigalugit aalisartoqarpoq (pisassiissutit niuerutigineqarsinnaasut nammineq pigisat tunngavigalugit aalisarneq (PNNP)):

- 1) Kalaallit Nunaata kitaani raajarniarneq.
- 2) Tunumi raajarniarneq.
- 3) Kitaata avataani qaleralinniarneq.
- 4) Kitaani avataasiorluni qaleralinniarneq.
- 5) Kitaani 68°30N-p avannaani aamma 75°00N-ip kujataani sinerissap qanittuani qaleralinniarneq.
- 6) Kalaallit Nunaata kitaani saattuarniarneq.

Imm. 2. Naalakkersuisut aalisagaqatigiit allat pillugit imaluunniit sumiiffiit aamma pillugit malittarisassanik aalajangersaanermikkut pisassiissutit immikkoortissinnaavaat pisassiissutitut pigisatut agguagassanngorlugit, aamma ukiumut pisassat pillugit malittarisassanik aalajangersaasinnaallutik.

Imm. 3. Imm. 1, nr. 5-mi aalisarneq pineqartillugu ingerlatsisut ataasiakkaat PNNP-mik aaqqissuussinnermut ilaapput, pineqartoq Naalakkersuisuniit tamanna pillugu nalunaarummik tigusaqarsimappat. Nalunaarut allakkatigut qinnuteqarnerup kingorna pissaaq.

Imm. 4. Pisassiissutit ilaannut ingerlatsisup oqartussaaffigisai, tak. imm. 3, PNNP-mik aaqqissuussinnermut nuussimangitsunut immikkoortinneqarsimasunit pisassiissutit ilanngaatigineqassapput. Pisassiissutit PNNP-mik aaqqissuussinnermut aalajangersarneqarsimasut akornanni pissutsit aamma pisassiissutit sinneruttut ingerlataqartut PNNP-mik aaqqissuussinnermut ilanngunnerini tamatigut naatsorsorneqartarput.

Imm. 5. Qinnuteqarneq, tak. imm. 3, qaqugukkulluunniit pisinnaavoq. PNNP-mik aaqqissuussinnermut ilaasoq ingerlataqartoq ukiup ilivitsup aallartinneraniit ilaalissaaq.

Imm. 6. Ingerlatsisoq toqqaannartumik toqqaannangitsumilluunniit imm. 1 naapertorlugu aaqqissuussinnermut ilaasoq aaqqissuussineq alla atorlugu sinerissap qanittuani qaleralinniarnermut akuersissummik pisinnaangilaq. Tamanna aamma PNNP-mik aaqqissuussinnermut kingusinnerusumilu ingerlataqartup peqataaneranut atuuppoq.

§ 29. Inatsisip atulersinnerani §§ 8, 9-mut aamma 28-mut ingerlataqartut, inatsisillu atuutilernera ukioq sioqqullugu akuersissuteqartut, TAC-mi pineqartumi amerlanerpaanik pisarineqarsinnaasunik ingerlatsisumut tunniunneqartut taamaaqataannik naapertuuttunik pisassiissutinit pigisanik atuisinnaatitaanermik tunineqassapput.

Imm. 2. Inatsisip atulersinnerani §§ 8, 9-mut aamma 28-mut ingerlataqartut, inatsisillu atuutilernera ukioq sioqqullugu aalisagaqatigiinni pisassiiffusuni aalisarnissamut pisinnaatitsisumik akuersissuteqartut, aamma amerlanerpaanik pisarineqarsinnaasunut atassuteqanngitsunik, ingerlatsisup PNNP-mik aaqqissuussinnermut ilaalernera sioqqullugu piffissami ukiuni kingullerni tallimani pisat tamakkiisumik nalunaarsorneqarsimasut ilaannik angallatip pisarisimasai tunngavigalugit aalisagaqatigiinni ataatsimi pisassiissutit ilaanni iluaquteqarsinnaanermut pisinnaatitaaffimmik tunineqassapput.

Imm. 3. Pisassiissutinit pigisat, tak. imm. 2, peqassutsinut ataasiakkaanut ingerlataqartup tunngaviusumik amerlassusii ingerlataqartut tamarmik tunngaviusumik amerlassusiisa katinnerinit agguarnerisigut naatsorsorneqartassapput, peqassutsimut pineqartumut PNNP-mik eqqussinermi immikkut siunertanut immikkoortinneqarsimasinnaasut ilanngaatilugit. Ingerlatsisup pisaasa amerlassusii tunngavigalugit piffissami ukiuni tallimani ukiumoortumik ingerlatsisut aalisarnerani amerlanerpaat pingasut katinnerisa inernerannit naatsorsorneqartarput, imm. 2-miittoq tunngavigalugu naatsorsorneqassaaq.

Imm. 4. Aalisagaqatigiinnut inatsisip akuerineqarnerata kingorna aatsaat PNNP-mut aqqissuussamut ilaalersut pillugit pisassiissutinit pigisanik tunniussineq pillugu malittarisassanik erseqqinnerusunik Naalakkersuisut aalajangersaassapput.

Ukiumoortumik pisassiissutininik aamma pisassiissutininik pigisanik kaaviiaartitsineq

§ 30. Pisassiissutinit pigisat, tak. § 28, pigisassatut imaluunniit qularnaveeqqutitut tunniunneqarsinnaapput aamma kingornunneqarsinnaallutik.

Imm. 2. Kalaallit Nunaata kitaani raajarniarnermi pisassiissutinit pigisat, toqqaannangitsumik pigisat ilanngullugit, § 32, imm. 1 naapertorlugu, inatsisartut inatsisaat atuutilermat sinerissap qanittuani raajarniarluni ingerlatsisumit pigineqartut, angallammi tunisassiornissamut marsip aallaqqaataani 2024-mi akuersissuteqanngitsumit angallammi tunisassiornissamut marsip aallaqqaataani 2024-mi akuersissutilimmut tunineqarsinnaanngillat.

Imm. 3. Pisassiissutininik pigisanut aamma ukiumoortumik pisassiissutininut kaaviiaartitsinermut kiisalu Naalakkersuisunut nalunaaruteqarnernut malittarisassanik erseqqinnerusunik Naalakkersuisut aalajangersaasinnaapput.

§ 31. Pisassiissutininik pigisanut aamma ukiumoortumik pisassiissutininut kaaviiaartitsinermut, matumani ilanngullugit pisassiissutininut pigisanut aamma ukiumoortumik pisassiissutit amerlassusaannut, Naalakkersuisunut tutsinneqartussanut atugassamik neqeroortitsinermut nittartakkamik Naalakkersuisut pilersitsissapput.

Imm. 2. Pisassiissutininik pigisanut aamma ukiumoortumik pisassiissutininut Naalakkersuisunut tutsinneqartunut, tak. imm. 1, Naalakkersuisut suliariumannittussarsiuussinertut ilusilimmik neqeroortutigineqassapput.

Imm. 3. Suliariumannittussarsiuussinermut atatillugu suliariumannittussarsiuussinermi peqataasunut piumasaqaatit tunngavilersuutillu pillugit erseqqarinnerusumik malittarisassanik Naalakkersuisut aalajangersaasinnaapput.

Pisassiissutinit amerlanerpaanik pigisat pillugit malittarisassat

§ 32. Inatsisitigut akisussaataitaasut pisussaataitaasullu toqqaannartumik imaluunniit toqqaannangitsumik, Kalaallit Nunaanni TAC-nik normu 1-imiit 5-imut taaneqartunik pigisat sinnerlugit pisassiissutinit pigisanik pigisaqaqqusaanngilaq, taamaattoq imm. 3 aamma 4 tak. Tassunga atatillugu piginninneq taasisinnaatitaanerit assigisaalluunniit aqqutigalugit taamaaqataanik sunniuteqarnernut naligiissinneqarpoq.

1) Kalaallit Nunaata kitaani raajarniarneq: 20,000%.

2) Tunumi raajarniarneq: 33,333%.

3) Kalaallit Nunaata Kitaani sinerissap qanittuani qaleralinniarneq, tak. § 28, imm. 1, nr. 5: 2,500%.

4) Kalaallit Nunaata kitaani saattuarniarneq: 17,000%.

5) Kalaallit Nunaata kitaani § 28, imm. 1-imut ilaasunik aalisagaqatigiinnik assigiinngitsunik avataasiorluni aalisarneq: 20,000%.

Imm. 2. Inuit ataasiakkaat arlaannaalluunniit, taakku qanigisaat ilanngullugit, toqqaannartumik imaluunniit toqqaannaanngitsumik Kalaallit Nunaannut TAC-ni pigisanik normu 1-imiit 3-mut allassimasut qaangerlugit pisassiissutinit pigisaqaqqusaanngillat. Tassunga atatillugu piginninneq taasisinnaatitaanerit assigisaalluunniit aqqutigalugit taamaaqataanik sunniuteqarnernut naligiissinneqarpoq. Soraarnerussutisianut karsit arlaanni ilaasortaanikkut pisassiissutinit pigisanik pigisaqarneq pisassiissutinit pigisanik inuup tamakkiisumik pigisaata naatsorsornerinut ilaassanngillat.

1) Kalaallit Nunaata kitaani raajarniarneq: 12,500 %

2) Kalaallit Nunaata kitaani sinerissap qanittuani qaleralinniarneq: 2,500%

3) Kalaallit Nunaata kitaani saattuarniarneq: 12,500%

Imm. 3. Ingerlatseqatigiiffiit pisortanit pigineqartut toqqaannartumik imaluunniit toqqaannaanngitsumik Kalaallit Nunaannut TAC-ni pigisanik normu 1)-imiit 5)-imut allassimasut qaangerlugit pisassiissutinit pigisaqaqqusaanngillat. Tassunga atatillugu piginninneq taasisinnaatitaanerit assigisaalluunniit aqqutigalugit taamaaqataanik sunniuteqarnernut naligiissinneqarpoq.

1) Kalaallit Nunaata kitaani raajarniarneq: 33,333%

2) Tunumi raajarniarneq: 33,333%

3) Kalaallit Nunaata kitaani sinerissap qanittuani qaleralinniarneq: 2,500%

4) Kalaallit Nunaata kitaani saattuarniarneq: 17,000%

5) § 28, imm. 1-imut ilaasunik Kalaallit Nunaata kitaani aalisagaqatigiinnik assigiinngitsunik avataasiorluni aalisarneq: 40,000%

Imm. 4. Ingerlataqartut sukkulluunniit uppersarsinnaassavaat imm. 1-2-imi piumasaqaatit naammassisimallugit.

Imm. 5. Tigusissusamat ukiumut pisassiissutit tamarmiusut aalisarnermut pineqartumut pisassiissutit amerlassusaasa killingat qaangissanngilaat, aalisarnermut tamatumunnga killigitinneqartut amerlaqatigaat.

Imm. 6. Aalisagaqatigiinnut, inatsisip atortuulereerneratigut pisassiissutit nammineq pigisat nioqqutigineqarsinnaasullu pillugit malittarisassanut ilaasut, pisassiissutit pigisat ingerlatsisup pigisinnaasaasa annertussutsimikkut annerpaaffissaat aalajangersarneqassaaq.

Imm. 7. Pisassat amerlanerpaaffissaat imm. 3, nr. 1-imi taaneqartut appartissinnaaneri pillugit Naalakkersuisut maleruagassiorsinnaapput. Appartitsinerit inuiaqatigiinnut pisussaaffiit, pisortat ingerlatseqatigiiffiutaasa pisussaaffiligassaat piffissaqarluarlunilu nalunaaruteqarnissamut piffissarititaasut isiginiarlugit ingerlanneqassapput.

Imm. 8. Oqaaseqatigiit siulliit kingorna aalajangiussaq pillugu Naalakkersuisut Inatsisartunut immikkut ilisimatitsissuteqassapput.

Pisassiissutinit pigisat siviussusilernerat

§ 33. Akuersissut ukiumoortumik nalunaarutigineqartassaaq, tak. § 22, piffissaq pisassiissutininik piginniffusoq sivikinnerpaaq imaassalluni:

- 1) Kalaallit Nunaata kitaani raajarniarneq: Ukiut 10.
- 2) Tunumi raajarniarneq: Ukiut 10.
- 3) Kalaallit Nunaata kitaani avataasiorluni qaleralinniarneq: Ukiut 10.
- 4) Kalaallit Nunaata kitaata sineriaata qanittuani qaleralinniarneq: Ukiut 10.
- 5) Kalaallit Nunaata kitaani saattuarniarneq: Ukiut 10.

Imm. 2. Aalisagaqatigiinnut, pisassiissutit nammineq pigisat nioqqutigineqarsinnaasullu kingusinnerusukkut ilaalersut pillugit malittarisassat, pisassiissutinit pigisanut tunniunneqartunut piffissap qanoq sivilutiginissaa Naalakkersuisut aalajangersassavaat.

Pisassiissutininik immikkut niuerutigineqarsinnaasunik atorunnaarsitsineq

§ 34. Piffissap pisassiissutininik piginniffiusup siviloqataanik ilimasaarinikkut pisassiissutit pigisat Naalakkersuisut atorunnaarsissinnaavaat. Pisassiissutininik atorunnaarsitsineq ukiumi ataatsimi amerlanerpaamik 20 % tikillugu pisassiissutininik tunniunneqarsimasuni atorunnaarsinneqarsinnaallutik.

Imm. 2. Pisassiissutininik pigisat, imm. 1 malillugu atorunnaarsinneqartut, pisassiissutininik agguasseqqinnissaa siunertaralugu Naalakkersuisunut tutsinneqassapput, tak. § 31.

Pisassiissutininik nammineq pigisanik nioqqutigineqarsinnaasunik pisassiissutininik atuineq.

§ 35. Pisassiissutinit pigisanik piginnittoq ukiumoortumik pisassiissutit 75%-iisa aalisarnissaannut pisussaaffeqarpoq, taamaattoq tak. § 39, imm. 4.

§ 36. Pisassiissutinit pigisat pissarsiarineqarnermik imaluunniit akuersissummut atajunnaarnermik kingorna qaammatit 18-it qaangiutsinnagit angallammut ataatsimut arlalinnuunniit atassuteqartinneqaqqilersimassapput angallatinik taakkuninnga piginnittunut akuersissummik tunniussinikkut.

Imm. 2. Piginnittup, akuersissutip angallammut attuumassuteqalernissaata tungaanut, piffissaliussap iluani pisassiissutit tamaasa ilaannakortumilluunniit tunisinnavaat.

Imm. 3. Angallatip umiunerani imaluunniit pissutsit immikkorluinnaq ittut atuunnerini, imm. 1 naapertorlugu Naalakkersuisut, immikkut akuersissummik piffissamik aalajangersimasumik nalunaaruteqarsinnaapput.

§ 37. Ingerlatsisunut nutaanut § 36, imm. 1-imi piffissaliussaq taaneqartoq qaammatit 24-t atuutissaaq, ingerlatsisut:

- 1) siusinnerusukkut toqqaannartumik toqqaannangitsumilluunniit pisassiissutinit pigisassanik peqarsimangippata,
- 2) pisassiissutinit pisassanut siusinnerusukkut aalajangiisuusumik sunniuteqarsimangippata, imaluunniit
- 3) piffissaliussap iluani pisassiissutittut pigisani annerpaaq 1/4-mik qaangersimappasuk, tak. § 32.

§ 38. Aalisarnermik ingerlatsisoq ukiumi pisassiissuteqarfiusumi ukiumut pisassiissutit 25 %-iini ukiup tulliani pisassiiffiusumit pisassiiffiusumulluunniit nuussisinnaavoq (pisassiissutit nuunneqarsinnaasut).

Imm. 2. Pisassiissutitut nuunneqarsinnaasunut piimasagaatinik matumani ilanngullugu imm. 1 naapertorlugu piffissami aalisarnermi sorlermi annertussutsinik nuussinerup pinissaanik Naalakkersuisut aalajangersaasinnaapput.

§ 39. Aalisarnermik ingerlatsisoq ingerlatsisumut allamut ukiumut pisassiissutit 10 %-ii tikillugit nuussisinnaavoq (ukiumut pisassiissutitik tuniniaaneq).

Imm. 2. Ukiumut pisassiissutitik nuussineq, tak. imm. 1 aamma imm. 4, ukiumut pisassiissutit nalunaarutigineqartut § 25 naapertorlugu ilanngaatigineqartassapput, taamaattorli imm. 4 takuuk.

Imm. 3. Ukiumut pisassiissutitik nuussisoqartillugu ukiumut pisassiissutit ilaannik nuunneqartunik pisassiissutitik nuunneqarsinnaasumik atuisinnaaneq annikillisineqassaaq.

Imm. 4. Teknikikkut, aningaasaqarnikkut, niuernermet tunngasutigut imaluunniit allanik immikkut pissuteqartumik ukiumi pineqartumi ukiumut pisassiissutit minnerpaamik 75 %-iisa aalisarnissaannut periarfissaqanngivissortoq ingerlatsisup uppersarsinnaappagu ukiumut pisassiissutit 10 % qaangerlugu tunniussinissamut Naalakkersuisut akuersillutik nalunaaruteqassapput.

Imm. 5. Ukiumut pisassanik tunniussineq pisassiissutit pigisanik atukkiussinertut isikkoqanngisaannassaaq.

Pisassiissutit pinngitsaaliinikkut nuunneqartarnerat

§ 40. Pisassiissutitik piginnittoq, pisassiissutit qaqineqanngitsuni pisassiissutit tuniarnissaanut pisussaaffeqalissaaq:

- 1) ukiuni pingasuni tulleriittuni § 35-p naammassinissaa periarfissaasimanngippat;
- 2) § 36, imm. 1-ip naammassinissaa periarfissaasimanngippat, imaluunniit
- 3) § 37, imm. 1-ip naammassinissaa periarfissaasimanngippat.

Imm. 2. Imm. 1, nr. 1 naapertorlugu tuniniaaneq ukiut pingasut taakku qaangiutsinnagit pisimassaaq. Imm. 1, nr. 2 aamma 3 naapertorlugit tuniniaaneq § 36-mi taamatullu § 37-mi piffissaliunneqartut qaangiutsinnagit pisimassaaq.

Imm. 3. Pisassiissutitik piginnittup imm. 1 naapertorlugu pisussaaffusoq naammassinngippagu, § 31-mi malittarisassat malillugit pisassiissutitik pigisanik tuniniaaneq piginnittoq sinnerlugu Naalakkersuisut ingerlatissavaat.

Imm. 4. Naalakkersuisut imm. 1-3 naapertorlugu tunisnermi malittarisassanik erseqqinnerusunik aalajangersaasinnaapput.

§ 41. Akuersissut atorunnaarsitaasimappat pisassiissutitik pigisanik piginnittoq pisassiissutit pigisat tuniarnissaannut pisussaaffeqarpoq, tak. 26, imm. 1. Tunisineq atorunnaarsitsinermi qaammatit arfinillit iluanni pissaaq.

Imm. 2. Pisassiissutitik piginnittup imm. 1 naapertorlugu pisussaaffusoq naammassinngippagu, § 31-mi malittarisassat malillugit pisassiissutitik pigisanik tuniniaaneq piginnittoq sinnerlugu Naalakkersuisut ingerlatissavaat.

Imm. 3. Naalakkersuisut imm. 1 aamma imm. 2 naapertorlugu tunisinermi malittarisassanik erseqqinnerusunik aalajangersaasinnaapput.

Kapitali 8

Aalisariutini inuttat

§ 42. Inuttanut piumasaqaatit pillugit aamma inuttat qanoq katitigaaneri pillugit Naalakkersuisut sukumiinerusumik malittarisassiorsinnaapput.

Kapitali 9

Usinik nuussineq, tunisineq suliareqqiinerlu

Usinik nuussineq

§ 43. Naalakkersuisut Kalaallit Nunaata aalisarnikkut oqartussaaffigisaani tulaassinissaq usinillu nuussisarneq kiisalu Kalaallit Nunaata aalisarnikkut oqartussaaffigisaata avataani kalaallit aalisariutaasa tulaassisarnerat usinillu nuussisarnerat pillugit malittarisassaliorsinnaapput.

Imm. 2. Kalaallit aalisariutaannit nunallu allamiut aalisariutaannit usinik nuussinert tamarmik taamaallaat Naalakkersuisut akuersissuteqarnerisigut pisinnaapput.

Tunisinert

§ 44. Tunitsiviit tunisassiorfiillu nutaat kiisalu tunisassiorfiup aalisakkanut allanut tunitsivinngorlugu imaluunniit tunisassiorfinngorlugu allanngortinnera pineqartumi kommunimiit akuersisoqqaartinnagu pilersinneqaqqusaanngilaq.

Imm. 2. Tunitsivinnik tunisassiorfinnillu nutaanik pilersitsinissaq pillugu, tunitsiviit pioreersut allanngortinneri pillugit aamma angallatinik tunitsivilineq pillugu kiisalu aalajangersagaq manna naapertorlugu tunniunneqartunik akuersissutinik utertitsineq pillugu malittarisassanik erseqqinnerusunik Naalakkersuisut aalajangersaasinnaapput.

Imm. 3. Tunitsiviit niuernikkut malitassaasa assigiiaarneri pillugit malittarisassanik erseqqinnerusunik Naalakkersuisut aalajangersaasinnaapput.

Suliareqqiineq

§ 45. Kalaallit aalisariutaanni taamaallaat suliareqqiisoqarsinnaavoq Naalakkersuisut tamatumunnga akuersillutik nalunaaruteqarsimappata.

Kapitali 10

Eqqissimatitsineq, piujuartitsinissaq siunertaralugu teknikikkut iliuusissat il.il.

§ 46. Naalakkersuisut pisuussutit illersorneqarnissaat pillugit malittarisassanik aalajangersaasinnaapput, tassunga ilanngullugit:

- 1) piffissat eqqissimatitsiviusut aamma sumiiffimmiit sumiiffimmut tamakkiisumik ilaannakortumilluunniit aalisarfigeqqusaanngitsut,
 - 2) angallatinik, aalisarnermi atortunik taakkulu atortuinik aaqqissuussineq atuinerlu,
 - 3) aalisarnermi ileqqorissaarnissamut malittarisassat,
 - 4) Aalisakkanut assigiinngitsunut allanullu minnerpaaffissaliinerit.
 - 5) nigartat angissusissat taakkulu uuttortarneqarnissat, kiisalu,
 - 6) aalisakkanik allanik aalisarnermi aalisakkanik aalajangersimasumik annertunerpaamik saniatigut pisarineqarsinnaasut.
- Imm. 2.* Naalakkersuisut piginnaatitsissuteqareernerisigut malittarisassat imm. 1, nr. 1-3-mi taaneqartut pillugit kommuninut ataasiakkaanut kommunimut ileqqoreqqusamik kommunalbestyrelsi aalajangersaasiinnaavoq. Ileqqoreqqusat Naalakkersuisunit akuerineqassapput.

Kapitali 11

Aalisarnermi uumassusilinnik misissuinerit misileraallunilu inuussutissarsiutigalugu aalisarnerit

Aalisarnermi uumassusilinnik misissuinerit ilinniagaqarnermullu atatillugu aalisarnerit

§ 47. Aalisarnermi uumassusilinnik misissuinissamut Naalakkersuisut akuersissuteqarnissat piunasaqaataavoq, taamaattoq imm. 3 takuuk.

Imm. 2. Naalakkersuisut Nunatsinni Pinngortitaleriffimmit oqaaseqaammik pissarsiniassapput aalisarnermi uumassusilinnik misissuinissamut akuersissummik tunniussisoqarnissaanut nalilersuinissamut atugassamik, takuuk imm. 1.

Imm. 3. Pinngortitaleriffik Naalakkersuisunit akuersissummik peqqaanngikkaluarluni aalisarnermi uumassusilinnut misissuinerit ingerlatsisinnaavoq.

Imm. 4. Ilinniartitsinissaq siunertaralugu aalisarnermi aalisarnermut killilersuutaasut atuuttut apeqqutaatinnagit Naalakkersuisut akuersissuteqarnerisigut ingerlanneqarsinnaavoq.

Imm. 5. Aalisarnermi uumassusilinnut misissuinerit aalisarnerup ingerlannissaanut malittarisassanut atuuttunut ilaangillat. Naalakkersuisullu akuersissutini imm. 1 aamma 4, malillugit atortussanngortinneqartuni misissuinissanut malittarisassanik erseqqinnerusunik aalajangersaasinnaapput.

Imm. 6. Naalakkersuisut aalisarnermi uumassusilinnut misissuinerit kiisalu ilinniarneq siunertaralugu aalisarnerit pillugit malittarisassiorsinnaapput, matumanilu ingerlannerinut kiisalu nalunaaruteqarnerit tunngasunik malittarisassat ilanngullugit eqqarsaatigalugit.

Inuussutissarsiutigalugu misileraalluni aalisarnerit

§ 48. Inuussutissarsiutigalugu misileraalluni aalisarnissamut Naalakkersuisunit akuersissuteqarnissaq piunasaqaataavoq.

Imm. 2. Inuussutissarsiutigalugu misileraalluni aalisarnissamut qinnuteqaatit Naalakkersuisunit nassinneqassapput, makkuninngalu imaqaassallutik:

- 1) Misileraalluni aalisarnermi siunertamut nassuiaat, tassaniissalluni misileraalluni aalisarnerup aalisarnermi sutigut naleqarnerulersitsinissamut iluaqutaasinnaanera naatsorsuutigineqarsinnaanersoq.

- 2) Misileraalluni aalisarnerup ingerlanneratigut, angusassallu ilimagineqartut tunniunnerisigut misileraalluni aalisarnermi ilimagineqarsinnaasut allaaserinerat.
- 3) Misileraalluni aalisarnerup nalunaarusiorfiginerata allaaserinera, soorlu angusarineqartunik tamanut saqqummiussineq.
- 4) Misileraalluni aalisarnerup aningaasalersornissaa pillugu paasissutissat, matumanilu Naalakkersuisunit tapiissuteqartoqarnissaanik qinnuteqartoqarsimanersoq.

§ 49. Naalakkersuisut, inuussutissarsiutigalugu misileraalluni aalisarnissanut ataasiakkaanut piumasaqaatinik erseqqinnerusunik aalajangersaassapput, matumanilu misileraalluni aalisarnermut naammassinninnissamut maleruagassat, nalunaarsuineq taamatullu inuussutissarsiutigalugu misileraalluni aalisarnek nalinginnaasumik aalisarnermik kinguneqassappat kikkut aalisarsinnaatitaanersut.

§ 50. Ingerlatsisoq inuussutissarsiutigalugu misileraalluni aalisarnissamut akuersisummik angusaqarsimasoq akuersisummi aalajangersarneqartutut misileraalluni aalisarnerup ingerlannissaanut nalunaarusiorfigisarnissaanullu pisussaaffeqarpoq, takuuk § 48.

Imm. 2. Inuussutissarsiutigalugu misileraalluni aalisarnermut pilersaarutini allannguutit pingaarutillit, tak. § 48, imm. 2, Naalakkersuisunit akuerineqarsimassapput.

Imm. 3. Inuussutissarsiutigalugu misileraalluni aalisarnissamut akuersisummut piumasaqaatit eqquutsinneqanngippata akuersissut arsaarinnissutigineqarsinnaavoq.

Kapitali 12

Paasissutissat

Paasissutissanik katersineq suliaqarnerlu

§ 51. Inatsimmik matuminnga aqutsinermut paasissutissat pisariaqartinneqartut katersorneqarnissaat, suliarineqarnissaat ingerlateqqinnissaallu Naalakkersuisut akisussaaffigaat. Naalakkersuisut tassunga atatillugu nakkutilliinermi siunertanut pisortat nalunaarsuiffiit ataatsimut ingerlassinnaavaat.

Imm. 2. Naalakkersuisut paasissutissat pillugit tamakkiisumik takussutissiussapput, takuuk imm. 1. Tamakkiisumik takussutissiimiissapput oqartussat, suliffeqarfiit, allalluunniit katersinermik suliarinninnermillu isumaginnissimasut pillugit paasissutissat.

Imm. 3. Naalakkersuisut aalisarsinnaanermut akuersisummik tunineqarsimasunut imaluunniit kalaallit erfalasuat atorlugu angallatinik piginnittunut atuisunulluunniit, angallatinik nunanit allanit pigineqartunik piginnittunut atuisunulluunniit Kalaallit Nunaannit akuersissuteqarlutik aalisartunut, kiisalu aalisakkerivinnut allanullu, paasissutissanik aalisarnerup aqunneqarnissaanut pisariaqartinneqartunik tunniusseqquisinnaapput. Tassunga ilaatigut ilaapput akuersisummik piginnittut aalisakkerivinnillu piginnittut, ingerlatseqatigiiffinnik piginnittuunermut tunngasut, angallatit sorliit atorneqarnersut, pisat, tulaassinerit, nunami tunisassiorneq, pisassiissutininik niuerneq, suliffeqarneq aamma aalisarnermi nunamilu tunisassiornermi aningaasaqarneq pillugit paasissutissat.

Imm. 4. Nalunaarsuutininik pilersuisut, takuuk imm. 3, paasissutissanik qanoq Naalakkersuisunut tunniussinissaat pillugu malittarisassanik Naalakkersuisut aalajangersaasinnaapput.

Imm. 5. Naalakkersuisut paasissutissat katersorneqarnissaannut, suliarineqarnissaannut ingerlateqqinnissaannullu akuersissutip oqartussanut, suliffeqarfinnut allanullu, soorlu suliffeqarfinnut namminersortunut, tamakkiisumik ilaannakortumilluunniit tunniussinissaq, tak. imm. 2, pillugu maleruagassiorsinnaapput.

Imm. 6. Ilisimatuussutsikkut atugassanik paasissutissanik katersinissaq siunertaralugu ilisimatuussutsikkut alaatsinaattunik ilaasoqarnissamut angallatip naalagaata pisussaaffilernissaa pillugu malittarisassanik Naalakkersuisut aalajangersaasinnaapput.

Paasissutissanik pissarsisinnaaneq ingerlatitseqqittarnerlu

§ 52. Naalakkersuisut paasissutissat katersorneqartut aqutsinermik, nakkutilliinermut, misissueqqissaarinermik ilisimatusarnermillu siunertaqartunut atugassanngortissavaat.

Imm. 2. Naalakkersuisut tamanut saqqummiussinikkut allatigulluunniit tamakkiisumik takussutissiamik makkuninnga imaqtartunik tamanut pissarsiarineqarsinnaasunnngortitsisinnaapput:

- 1) Akuersissummik piginnittut, akuersissutit taakkunanilu atukkat aalisarnermilu suliarinniffit suliffissuit allasimasut kiisalu taakkunani piginnittut aqqqissugaaneri pillugit paasissutissat, tassunga ilanngullugu taakku pisassiissutinit pigisarisinnaasat naatsorsorneri,
- 2) TAC-t aamma peqassutsinut ataasiakkaanut pisassiissutit, ilisimatuussutsikkut siunnersuineq aamma pisassiissutit aalisartut akornanni agguarneri pillugit paasissutissat,
- 3) Pisassiissutit amerlassusiat pisassiissutinilu pigisat aalisagaqatigiinnut aamma akuersissutinik pigisalinnut agguataarlugit;
- 4) Aalisariutit pillugit paasissutissat, tassunga ilanngullugit teknikikkut paasissutissat, piginnaasaq, pisinnaasat, pisassiissutinik atuineq, tunisat annertussusii aamma tunisat nalingi;
- 5) Tunisat annertussusii aamma tunisinerit nalingi suliffissuarnut agguarneri pillugit paasissutissat;
- 6) pisassiissutinik niuernerit pillugit paasissutissat, aamma
- 7) aalisagaqatigiinni ataatsini pisassiissutit iluaqutigineri ukiullu pisassiiffiusut pillugit paasissutissat.

Imm. 3. Naalakkersuisut takussutissiaq ingerlaavartumik tamanut saqqummiuttassavaat nutartertarlugulu.

§ 53. Inatsisartut ukiakkut ataatsimiinneranni aalisarnermi ineriartorneq pillugu ukiumoortumik nalunaarut Naalakkersuisut saqqummiuttassavaat. Ukiumoortumik nalunaarut Kalaallit Nunaata aalisarnikkut aningaasaqarneranik aamma aalisarnermik aqutsinermik imaqassaaq, tassunga ilanngullugit paasissutissat katersorneqartut taakkulu atorineqarneri pillugit takussutissiaq, aqutsinermi pilersaarutit atuuttut, aqutsinermi pilersaarutit nutarterneqarsimasut aamma allaassutaasinnaasut aamma aalisakkerivinnut inatsisini malittarisassat atuuttut pillugit takussutissiaq tassunga ilanngullugit oqartussaaneq pillugu aalajangersakkat suut atorineqarsimanersut.

Kapitali 13

Aalisarneq pillugu Siunnersuisoqatigiit

§ 54. Naalakkersuisut Aalisarneq Pillugu Siunnersuisoqatigiit pilersissavaat, taakku suliassaraat Naalakkersuisunut oqaaseqaateqarnissaq.

Imm. 2. Naalakkersuisut Aalisarnek Pillugu Siunnersuisoqatigiit qinnuigisinnaavaat uku pillugit oqaaseqaateqarnissamut:

- 1) inuussutissarsiutigalugu aalisarnerup ingerlanneqarnissaa aaqqiiffigineqarnissaalu pillugit pilersaarusiorneq malittarisassaliornertu,
- 2) pisaqarsinnaassuttip, pisassiissutit, aalisarnermi atortunik atuinnissap, umiarsuarnik tunitsivilinissat kiisalu pisanik kaaviiartinneqarnissap aalajangersarneqarnerat, aamma
- 3) aalisarnerup inuussutissarsiutitut nungusaataanngitsumik ineriartortinneqarnera siuarsarniarlugu suliniutit.

Imm. 3. Naalakkersuisut suliat kinguartinneqarsinnaanngitsut pillugit Aalisarnek pillugu Siunnersuisoqatigiinni ilaasortat tamakkerlugit allakkatigut tusarniaaffigisassavaat.

Imm. 4. Aalisarnermi soqutigisaqatigiit kattuffii attuumassutillit ilaasortanngortinneqarsinnaapput. Naalakkersuisut ilaasortaanermut piumasaqaatinik aamma siunnersuisoqatigiit katitigaanerannut malittarisassanik erseqqinnerusunik aalajangersaasinnaapput.

Imm. 5. Aalisarnek pillugu Siunnersuisoqatigiit suliaminnut qanoq suleriuseqassanerlutik aalajangersaassapput.

Imm. 6. Naalakkersuisut Aalisarnek pillugu Siunnersuisoqatigiit ataatsimiinneranni allattoqarfimmik isumaginnissapput, kiisalu taakku ataatsimiinnerinut atasunik aningaasartuutit akilertassallugit.

Kapitali 14

Nakkutilliineq

§ 55. Inatsisartut inatsisaanni uani aalajangersakkanik inatsillu naapertorlugu malittarisassanik malinnittoqarneranik nakkutilliineq pillugu Naalakkersuisut sukumiinerusunik malittarisassiorsinnaapput.

Imm. 2. Nunat tamat isumaqatigiissutaat naapertorlugit Kalaallit Nunaata nakkutilliinissamut pisussaaffimminik naammassinninnissaa siunertarlugu Naalakkersuisut aalisarnermik nakkutilliineq pillugu sukumiinerusunik malittarisassiorsinnaapput.

Imm. 3. Pisat Inatsisartut inatsisaannut uunga akerliusumik pisarineqarsimasut allanut tunniunneqarnissaat, pisarineqarnissaat tuniniarneqarnissaallu pinngitsoortinniarlugu Naalakkersuisut makku pillugit malittarisassiorsinnaapput:

- 1) pisanik pissarsisimaneq pillugu paasissutissiinissamut pisussaaffeqarneq;
- 2) ingerlatalinnit aalisarsinnaatitaanngitsunit pisaannik tigusinissamut inerteqquteqarneq, kiisalu
- 3) pisarineqarsinnaasut pisareernerisa kingorna pisanik tigusinissamut inerteqquteqarneq.

Imm. 4. Aalisakkanik tulaassineq, aalisariutit aamma aalisakkanik assartuutit aaqqissugaaneri ingerlannerilu, nakkutilliisoqarnissaanik pisariaqartutut missiliornera pillugu malittarisassanik erseqqinnerusunik Naalakkersuisut aalajangersaasinnaapput.

§ 56. Nakkutilliinermi Oqartussat kalaallit nunaata aalisarnikkut oqartussaaffigisaani aalisartunut angallatinut tamanut, nunat tamalaat imartaanni aalisartunut kalaallit angallataannut ikisinnaapput, nakkutilliineq nunat marluk imaluunniit nunat tamalaat isumaqatigiissutaat naapertorlugu nakkutilliisoqartillugu, aamma aalisarnermi atortunik pisanullu atatillugu misissuisinnaallutik.

Imm. 2. Nakkutilliinermi Oqartussat aalisarnermik ingerlatsisup aalisarsinnaatitaanerminut uppersarsaammik atuuttumik takutitsinissaa piumasarisinnaavaat.

Imm. 3. Pisinnaatitaaffiit imm. 1-imi aamma 2-mi taaneqartut eqqartuussivik siumut aalajangiiseqqaarnagu pissusissamisoortumik kinaassutsimut uppersaammik takutitsinikkut ingerlanneqarsinnaapput.

Imm. 4. Naalakkersuisut nakkutilliisut piginnaatitaaffi suliaasaallu pillugit sukumiinerusunik malittarisassaliorsinnaapput.

§ 57. Nakkutilliinermi Oqartussat aalisariutit § 56, imm. 1 naapertorlugu sulinerminnut atatillugu iliuuseqarniarlutik unitsissinnaavaat ikiffigalugillu, matumunnga ilanngullugu umiarsuit uppersaataat, aalisarnermi allattuiffiit, usunik tunisassiornernullu nalunaarsuiffiit assigisaallu misissuiffiginarlugit kiisalu aalisarnermi atortut pisallu misissuiffigisinnaallugit aammalu aalisarnermi atortut suliamut atatillugu misissugassatut isumannaatsumut inisseqqusinnaallugit. Taamatuttaaq angallatit pisanik misissuiffiginissaat, usingiaatinissaat atortutigullu misissuiffignissat siunertarlugit Kalaallit Nunaanni umiarsualivimmut toqqakkamut tulaqquneqarsinnaapput.

Imm. 2. Pisinnaatitaaffiit imm. 1-imi taaneqartut eqqartuussivik siumut aalajangiiseqqaarnagu pissusissamisoortumik kinaassutsimut uppersaammik takutitsinikkut ingerlanneqarsinnaapput.

Imm. 3. Angallatinik nakkutilliissutinik ikkussuineq atornerilu pillugit malittarisassanik Naalakkersuisut aalajangersaasinnaapput, tassunga ilanngullugit angallatip sumiiffianik, sammivianik sukkassusianillu nassiusisartut kiisalu nakkutilliinermi oqartussanut angallatit ingerlataqarneri allat il.il. kiisalu CCTV (assiliissut atorlugu nakkutilliissutit) pillugit malittarisassat.

Imm. 4. Angallatip nakkutilliissutaasa atortuinut piumasaqaatitut malittarisaanut taassumalu atorneqarneranut Naalakkersuisut aalajangersaasinnaapput.

§ 58. Nakkutilliinermik oqartussanit aallartitaq, kalaallit, nunallu allamiut angallataanni, kalaallit nunanni akuersissuteqarlutik aalisartunut misissuinissamut nakkutilliinissamullu siunertaqarlutik suliaqarnermi angallatini ilaasoqarsinnaaneranik peqqusisnaapput.

Imm. 2. Nakkutilliinermi Oqartussat aalisariutit Kalaallit Nunaanni tulaassisarnerat, Kalallit Nunaata aalisarnikkut oqartussaaffigisaani usunik nuussisarnerat kiisalu Kalallit Nunaata aalisarnikkut oqartussaaffigisaata avataani kalaallit aalisariutaasa usunik nuussisarnerat nakkutigissavaat.

Imm. 3. Imm. 1 naapertorlugu nakkutilliinermut atatillugu angalanermut, najugaqarnermut nerisaqarnermullu aningaasartuutit angallammik piginnittut akilertassavaat. Naalakkersuisut umiarsuaatileqatigiiffiit nakkutilliinermi aningaasartuutinik annertunerusumik matussusiisarnissaat pillugu malittarisassaliorsinnaapput, tassani aningaasartuutit nakkutilliinerullu siunertaa naapertuuttut nalilerneqarpata.

Imm. 4. Aalisariutini inuttat piumasaqarfigineqarnermikkut nakkutilliisut nakkutilliinerminnut atatillugu oqartussanut suliamut attuumassuteqartunut attaveqarnerannut atatillugu angallatip radiuanik, qarasaasiakkut attaveqaataanik nalunaarasuartaataanillu akiliuteqartinnagit atuisinnaatissavaat.

Imm. 5. Nakkutilliinermi Oqartussat piginnaatitaaffi imm. 1-imi 2-milu taaneqartut siumut eqqartuussiviit akuersiseqqaarnagit ingerlanneqarsinnaapput kinaassutsimut uppersaammik takutitsinikkut.

Imm. 6. Naalakkersuisut nakkutilliisut imm. 1 aamma 2 malilugit piginnaatitaaffi suliaasaallu pillugit malittarisassaliorsinnaapput.

§ 59. Inatsisartut inatsisaat una tassanngaluunniit malittarisassa atulersinneqartut naapertorlugit nakkutilliinikkut misissuinissaq siunertaralugu Nakkutilliinermi Oqartussat piumasarisinnaavaat aalisariut piffissami aalajangersimasumi piffimmik aalajangersimasumiinnissaa. Sapinngisamik piffissaq sumiiffissarlu umiarsuup naalagaanut isumaqatigiissutigineqartassapput.

§ 60. Aalisariutip aalisarnissamut atortulersorneqarsimasup Kalaallit Nunaata aalisarnikkut oqartussaaffigisaani aalisarsinnaatitaaffiginngisaminiikkuni aalisarnermut atortuni aalisariutip iluani toqqorsimatissavai.

§ 61. Nakkutilliinermi Oqartussat nakkutilliinerup ingerlannissaanut pisariaqarpat uku pillugit nalunaaruteqarsinnaapput:

- 1) tulaassivissanut peqqusineq inerteqquteqarnerlu,
- 2) tulaassinissamut piffissanik peqqusineq inerteqquteqarnerlu,
- 3) nakkutilliinermut oqartussat tulaassinermi usinillu nuussinermi najuunnissaannut peqqusineq, aamma
- 4) uuttortaanissap siumut nalunaarutigineqarnissaanik peqqussut taamatullu uuttortaanissamut piginnaatitaasumik uuttortaaartumillu uuttortaaasoqassasoq.

§ 62. Angallatip naalagaa, suliffeqarfinnik piginnittut sulisullu Inatsisartut inatsisaata taannalu naapertorlugu malittarisassanik aalajangersarneqartumi malinninnerannik nakkutilliinermut atatillugu nakkutilliisunit piumaffigineqarnermikkut paasissutissanik tamanik tunniussissapput, tassunga ilanngullugit aningaasaqarnikkut naatsorsuuserinikkullu pissutsit, nakkutilliinerup naammassineqarnissaanut pingaaruteqartut taamatullu nakkutilliinermi misissugassanik tigusinermi naqitanngortitsinerit tunniussinermi aamma elektroniskinngorlugit nalunaarsukkat naqitanngortinneqarnerini nakkutilliinermut oqartussanut akeqanngitsumik ikiutissallutik.

Imm. 2. Aalisarnermik ingerlatsisunik pisaminnik tunisaqartartunik nakkutilliinermut atatillugu nakkutilliinermi oqartussat kukkunersuiusumik naalagaaffimmit akuerisaasumik nalunaarsukkamilluunniit atortunik misissorneqarsinnaasunik misissuisussamik toqqaasinnaapput. Misissuineq pisaminik tunisaqartumit akilerneqassaaq.

§ 63. Nakkutilliinikkut Oqartussat, Inatsisartut Inatsisaat una imaluunniit inatsit naapertorlugu aalajangersarneqartut malittarisassat naapertorlugit, pisariaqarfinni qaqugukkulluunniit kinaassutsimik uppersaammik pissusissamisoortumik takutitsinikkut, eqqartuussivik siumut aalajangiiseqqaarnagu, suliffeqarfiit angallatillu inatsimmik malinninneranik misissuinissaq siunertaralugu isersinnaatitaapput.

§ 64. Aalisakkanik tunisineq il.il. inerteqqutaassaaq:

- 1) aalisarnerup ingerlanneqarnera pillugu malittarisassanut akerliusumik aalisartoqarsimappat,
- 2) pisatut imarisat katitigaaneri pillugit malittarisassanut naapertuutinngippata imaluunniit
- 3) imarisat nalunaarsorsimanngippata, angallatip allattaavianut allanneqarsimanngippata imaluunniit inatsit imaluunniit inatsit naapertorlugu aalajangersarneqartut malittarisassat naapertorlugit nalunaarutigineqarsimanngippata.

Imm. 2. Naalakkersuisut, aalisakkanik tunisisumut il.il., imm.1-mi piumasaqaatinik naammassinninneranut uppersaatinut malittarisassanik aalajangersaasinnaapput.

Imm. 3. Aalisakkat imm. 1-imi pineqartut sapinngisamik uumatillugit pisariaqarnerisa kinguninngua ingerlaannartumik imaanut avalatsinneqassapput.

§ 65. § 64-mi pineqartumi aalisakkanik tunisisoq § 68 naapertorlugu aalisakkanik tigusermut atatillugu akisussaajunnaarsinneqarsinnaavoq, qaqinneqartut missiliukannerlugu angissusaat katitigaanerallu taamatullu ateq najugarlu ingerlaannartumik Nakkutilliinikkut Oqartussanut nalunaarutiginerisigut.

Imm. 2. Aalisakkat imm. 1 malillugu nalunaarutigineqartut imatut inissinneqassapput taakkuninnga nakkutilliineq ingerlanneqarsinnaalluni aamma nakkutilliinermi oqartussaniit akuersisoqartinnagu tuniniarneqartussaanatik il.il.

Imm. 3. Aalisakkani qaqinneqartuni imarisat ilai § 64-imi pineqartut naapertorlugit, qaqinneqartut tamarmiullutik inatsimmik unioqqutitsinerussapput, unioqqutitsinerup annertussusaanik immikkoortiterinermi misiliutissanik tiguserisoqarneratigut Nakkutilliinermi Oqartussat najuunnerini pisimangippat.

§ 66. Nakkutilliinermi oqartussat aalisarnerup ingerlanneqarnera pillugu malittarisassanut akerliusermik aalisarnermi pisarineqarsimasut iginneqarnissaanik peqqusisinnaapput, imaluunniit imai pisat katitigaaneri pillugit malittarisassanut naapertuutinngippata.

§ 67. Inatsimmi imaluunniit inatsit naapertorlugu malittarisassanik atulersinneqartunik atornera, ilusaa, inissinneri, nalunaaqutserneri aalisarnermilu atorlut nalunaaqutserneri pillugit aamma nigartaqqortussusii pillugit malittarisassanik unioqqutitsinermi nakkutilliinermi oqartussat pisariaqartunik iliuuseqassaaq, tassunga ilanngullugu atorlut aamma aalajangersaanermi pituttuinnermilu atorlut peerneqarnissai isumagalugit.

Kapitali 15

Pineqaatissiissutit

§ 68. Inatsimmi immikkut allamik tunngavissaqarluni pineqaatissiissut sakkortunerusoq atorineqartariaqartoq isumaqartoqanngippat, akiliisitaanermik pineqaatissinneqassaaq:

1) inatsimmi ukunanga unioqqutitsisoq; § 6, imm. 2, § 8, imm. 1, § 9, § 10, imm. 1-3, § 13, § 14, imm. 2, § 21, § 24, imm. 2, § 32, § 35, § 36, imm. 1, § 37, § 38, imm. 1, § 39, imm. 1, aamma imm. 5, § 40, imm. 1, § 41, imm. 1, § 44, imm. 1, § 45, § 47, imm. 1, § 48, imm. 1, § 50, imm. 1, § 58, imm. 3, § 60, § 64, imm. 1 og imm. 3, aamma § 65, imm. 2,

2) § 56, imm. 2, § 57, § 58, imm. 1, § 59, § 61, § 62, imm. 1, aamma § 66, naapertorlugit nalunaaruteqaqqusaanermik malinninngitsaq,

3) Inatsisartut inatsisaannik uuminnga tassanngaluunniit malittarisassat aalajangersarneqartut naapertorlugit akuersisummi imaluunniit aalisarsinnaanermut akuersisummi piumasaqaatinik sumiginnaasoq,

4) pisortani oqartussanut eqqunngitsunik salloqittaalluniluunniit paasisutissiisoq imaluunniit inatsimmi inatsilluunniit naapertorlugu malittarisassat aalajangersarneqartut naapertorlugit peqqussutigineqartunik paasisutissiinnngitsaq, imaluunniit

5) § 56, § 58, imm. 4, § 61, nr. 3, aamma § 63 naapertorlugit nakkutilliinermi oqartussanik isertitsinngitsoq akiliisinneqarsinnaavoq.

Imm. 2. Inatsisartut inatsisaat una naapertorlugu malittarisassani aalajangersarneqartuni aalajangersarneqarsinnaavoq aalajangersakkanik unioqqutitsineq akiliisitsinikkut pineqaatissiinermik kinguneqarsinnaasoq.

Imm. 3. Inatsisartut inatsisaat imaluunniit maligassat atuutilersinneqartut Inatsisartut inatsisaat akiliisitsissummik aalajangersaanissamik tunngavissaqartitsippata, akiliisitsissut Kalaallit Nunaanni Pinerluttulerinermi inatsimmi kapitali 5-imi malittarisassat malillugit inatsisitigut pisinnaatitaasoq pisussaataasorlu akiliisitsissummut akileeqqullugu peqquneqarsinnaavoq.

Imm. 4. Angallat atorlugu unioqqutitsinerni angallatip piginnittua atuisualuunniit akiliisussanngortinneqarsinnaavoq, pineqartoq piaarinani mianersugaalliorluniluunniit Inatsisartut inatsisaannik uuminnga tassanngaluunniit malittarisassanik unioqqutitsiguarpat.

§ 69. Unioqqutitsineq akiliisitsinermi qaffasinnerusumik kinguneqartinneqannginnissaanik nalilerneqarpat, Naalakkersuisut nalunaaruteqarsinnaapput, inuk pineqartoq unioqqutitsinermi pisuusutut nassuerpat piffissaliunneqartullu ersarinnerusup ingerlanerani, sivitsuinnissap qinnutiginerata kingorna, akiligassap nalunaarummi allanneqarsimasup akilernissaanut piumassuseqarluni nassuerpat, suliaq eqqartuussivimmi suliarineqanngitsumik aalajangiiffigineqarsinnaasoq. Taamatuttaaq arsaarinnittoqarnissaanik piumasaqaateqarneq, tassunga ilanngullugu pigisanik nalilinnik arsaarinnissinnaaneq eqqartuussivikkoortitsinngikkaluarluni aalajangiiffigineqarsinnaapput.

§ 70. Suliani allaffissornikkut suliarineqartuni, tak. § 69, Kalaallit Nunaanni eqqartuussisarneq pillugu inatsimmi § 347, imm. 1 aamma § 437, imm. 2, nr. 2 – 3, aamma imm. 3, assigalugit atuutsinneqarpat.

Imm. 2. Akiliisitsissut piffissaagallartillugu akilerneqarpat, imaluunniit akuerineqarnerata kingorna akilerneqarpat imaluunniit pineqaatissiineq atorneqarpat malersueqqinnissaq atorunnaassaaq.

§ 71. Kalaallit Nunaanni pinerluttuleringe pillugu inatsimmi arsaarinnittarneq pillugu malittarisassat Inatsisartut inatsisaanni uani aamma atorneqassapput.

Imm. 2. Kisiannili unioqqutitsilluni angallat atorlugu aalisarnermi aalisarnermi atortut atorneqartut, angallatip pisat taakkualuunniit nalingi tamaasa arsaarinnissutaasinnaapput, tassanili pineqaratik pisat unioqqutitsinani ingerlatsinermeersutut uppersarneqartut.

Imm. 3. Taamatuttaaq pisat pillugit annertuumik arlaleriarluniluunniit paasissutissiisoqarnerani amigartumilluunniit paasissutissiisoqarnerani angallammik taassumaluunniit nalinganik arsaarinnittoqarsinnaavoq.

Imm. 4. Inatsisartut inatsisaani matumani malittarisassat atuutilersinneqartut naapertorlugit aalajangersakkanik unioqqutitsineq arsaarinnissummik kinguneqarsinnaanerani aalajangersarneqarsinnaavoq, takukkit imm. 1-3.

Imm. 5. Naalakkersuisut pisat atorneqarnissaa, tassunga ilanngullugu pisat nunami tunitsivimmi suliareqqinneqarnissaanut tunineqarnissaa pillugit aalajangersinnaapput.

§ 72. Pisat imaluunniit pisat nalingi imaluunniit taakku ilaat arsaarinnissutigineqarpat arsaarinninnermut atatillugu angallat peqquneqarsinnaavoq pisat taakkunatut annertussusillit pisanit

allanit immikkoorteqqullugit aamma nakkutilliisut taakkunannga nalunaaqutsiinissaat akuerissagaa. Taamaaliornikkut pisat nalingi arsaarinnissutigineqarsimasut pisallu allat akuleruttoornissaat pinngitsoortinneqarsinnaanngippat angallat peqquneqarsinnaavoq pisat nalingi arsaarinnissutigineqarsimasut tulaateqqullugit.

Imm. 2. Immikkoortitsineq nalunaaqutsiinerlu angallat Kalaallit Nunaata aalisarnikkut oqartussaaffianiitillugu pisanik useqartillugu ingerlanneqassapput.

§ 73. Isumaqaarnissaq tunngavissaqarpas angallat Inatsisartut inatsisaannik taannaluunniit naapertorlugu malitassatut aalajangersarneqartunik akiliisitsinermik arsaarinninnermilluunniit kinguneqarsinnaasunik unioqqutitsinermi atorineqarsimasoq, angallat nakkutilliinermut oqartussanit tigummigallarneqarsinnaavoq. Suliani angallatip Kalaallit Nunaanni eqqartuussisarnermi inatsimmi kapitali 37 malillugu tigummigallarneqarnerani taamaaqataanik atorineqassaaq.

Imm. 2. Kisiannili taamaallaat isumaqaarnissaq pissutissaqarpas nunat allamiut angallataat Kalaallit Nunaata aalisarnikkut oqartussaaffiata iluani unioqqutitsisimasoq aammalu angallat aalisarnikkut oqartussaaffiup iluaniitillugu malersorneqarsimappat uniganilu ingerlaannarsimappat Kalaallit Nunaata aalisarnikkut oqartussaaffiata avataani unitsinneqarsinnaavoq.

Imm. 3. Taamatut akuliuffigineqartoq qinnuteqarpas, politiit piaartumik kingusinnerpaamillu nalunaaquttap akunneri 24-it pingasut qaangiutsinnagit suliaq eqqartuussivimmu saqqummiutissavaat, taassumalu akuliunneq akuerineqarsinnaanersoq aalajangissavaa.

§ 74. Angallat § 73, malillugu tigummigallagaasoq, akiliisitsissummut akiligassat arsaarinnissutigineqartullu nalingi suliaassallu suliarineranni aningaasartuutaasut akilerneqarnissaasa tungaanut, imaluunniit akiligassat qularnaveeqqusernissaasa tungaannut aamma § 68 malillugu qanoq iliuusissat naammassineqarnissaasa tungaannut, eqqartuussisoqareerneratigut akiliisitsissutissamilluunniit aalajangiisoqareerneratigut atortui tamaasa ilanngullugit tigummigallagaasinnaavoq. Suliassap inaarutaasumik aalajangiivigineqarnerata kingorna qaammatit marluk qaangiutsinnagit tamanna pinngippat angallat atortullu naammassiniarneqarsinnaapput.

Imm. 2. Angallammik atuisimasoq pisinnaatitaanani taassuminnga atuisimappat imm. 1-imil malittarisassat atuutissanngillat.

§ 75. Inatsimmi matumani aalajangersakkanik unioqqutitsinermik eqqartuussivinnut suliaassanngortitat Kalaallit Nunaanni Eqqartuussivimmu suliaqartussatut siullertut suliakkiutigineqassapput.

Imm. 2. Akiliisitsinerit Inatsisartut inatsisaat una taannaluunniit naapertorlugu malittarisassat aalajangersarneqartut naapertorlugit aalajangerneqartut Nunatta Karsiata pisassarissavai.

Kapitali 16

Atuutilersitsineq ikaarsaariarnermilu aalajangersakkat

§ 76. Inatsisartut inatsisaat 1. januar 2025 atuutilissaaq, taamaattorli § 24, imm. 2-mi pisanik 30 %-inik tulaassisussaataaneq 1. januar 2030 atuutilissalluni.

Imm. 2. Tassunga peqatigitillugu Aalisarneq pillugu Inatsisartut inatsisaat nr. 18, 31. oktober 1996-imeersoq atorunnaarsinneqarpoq.

Imm. 3. Malittarisassat Inatsisartut inatsisaat nr. 18, 31. oktober 1996-imeersaq kingusinnerusukkut allannguuteqartoq naapertorlugu atuutilersinneqarnikut atorunnaarsinneqarnissamik tungaanut imaluunniit malittarisassanik nutaanik taarserneqarnissamik tungaanut atuutiinnassapput.

§ 77. § 9, imm. 3, nr. 2-mi allassimasoq piginnittuuneq pillugu piumasaqaat inatsisip atulersinneraniit kingusinnerpaamik ukiut qulit kingorna naammassineqarsimassaaq.

Imm. 2. Ingerlatseqatigiiffik, suliffeqarfik imaluunniit inuit ataasiakkaat, inatsisip atuutilernerani annerpaamik pigisarineqartussat qaangerlugit pisassiissutini pigisallit, tak. § 32. imm. 1, 2 aamma 3, piffissap killeqartup iluani pisassiissutini pigisanik tunniussinnermi, piffissami killilimmi pisassiissutit pigisat aalisakkat amerlassusaat attuumassuteqartoq qaangersimassanngikkaa, § 33-mi oqaatigineqartoq, inatsisip atortuulerneranit piffissami killilimmi pisassiissutini pigisat nalinga, piffissap killeqartup iluani pisassiissutini pigisanik annerpaamik pigisaqarneq pillugu malittarisassat eqquutsinneqassasut qulakkiissavaat.

Imm. 3. § 10-mi allanneqartoq inuussutissarsiutigalugu aalisarnermut atorneqartunik angallatinik meterinik arfinilinnik angissusilinnik mikinerusunilluunniit nalunaarsuineq inatsisip atuutilerneraniit ukioq ataaseq qaangiutsinnagu naammassineqarsimassaaq.

Kalaallit Nunaanni Namminersorlutik Oqartussat, ulloq 22. maaji 2024

Múte Bourup Egede
Naalakkersuisut Siulittaasuut

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

[Linkit iluaqutaasussat](#)

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut

